

BASHATIR 001

Zaidi ya Siasa. Maono
ya Maendeleo ya
Kisauni

*“Huu ni Mwanzo Na Mwisho
Watauona”*

Safari ya 2027. Ahadi
Yangu, Mpango Wangu

HADITHI YANGU


Mimi ni Mbarak Said Bashatir, mzaliwa halisi wa ardhi ya Kisauni Mwandoni hasa. Hadithi yangu haijaandikwa kwenye vichwa vya habari wala katika ofisi za juu; imeandikwa kwenye vumbi la mitaa yetu, kwenye mifumo iliyovunjika ambayo watu wetu huvumilia kila siku, na kwenye ndoto tunazobeba mioyoni mwetu kila alfajiri.

Nimeishi maisha ya watu wetu asubuhi za soko la Kongowea ambako kina mama wanang'ang'ania kuhakikisha familia zao hazilali njaa, pilikapilika za mitaa ya Bamburi zilizojaa mapambano ya kila siku, utulivu wa sala za jioni misikitini mwetu, na kimya kinachoumiza cha vijana waliomezwa na ukosefu wa ajira, uhalifu, na uraibu wa dawa za kulevyia. Mimi si mgeni wa hayo mateso mimi nimetoka humo humo.

Mimi ni baba, ni mume, na ni mtu wa imani thabitii. Familia yangu ndiyo dira yangu kila siku hunikumbusha kuwa uongozi wa kweli hujengwa juu ya misingi ya uwajibikaji, ujasiri wa kuvumilia, moyo wa kujitolea, na kusema ukweli bila woga.

Haya ndiyo maadili yanayoniongoza. Nina ndoto ya Kisauni ambapo kila nyumba inaheshimiwa, kila mzazi anahisi thamani yake, na kila kijana anaamini kuwa kesho yake ni bora kuliko leo. Hilo ndilo lengo langu kuleta uongozi unaogusa maisha ya watu kwa vitendo, si maneno.

Nimekuwa pamoja na watu wangu nimepita mitaa midogo ya Mwandoni, nikasikiliza vilio vya kina mama wa Magogoni, nikaona ndoto za vijana wa Mwakirunge, na nikahisi matumaini ya kina baba wa Shanzu wakipambana kwa familia zao. Sijasimama mbali na wananchi nimesimama katikati yao. Nimejifunza kimya kimya, nimeheshimu sauti zao, na nimechukua hatua kwa hekima na moyo wa utumishi. Huu siyo tu uongozi, huu ni wito na huu wito si wa kushindwa.



KWA NINI?

Kwa nini nataka kuwa Mbunge wenu? Sababu ni moja tu: kwa sababu najua Kisauni inastahili zaidi. Si ahadi tupu, bali matendo ya kweli. Tumevumilia shule zisizoendelea, huduma za afya zilizopuuzwa, mitaa isiyo salama, vijana waliodharauliwa, na uongozi unaopotea kila mara tunapouhitaji.

Kiti hiki kwangu si jina, si cheo ni dhamana takatifu. Ni jukumu. Ni wito. Sifuatilii umaarufu, nafuatilia kusudi. Kisauni si ramani tu ya kisiasa ni watu. Ni kina mama na kina baba wetu, watoto wetu, historia yetu, harakati zetu, imani yetu, na ndoto zetu za baadaye. Na naamini kwa moyo wangu wote kuwa Kisauni inaweza kuinuka. Inaweza kusimama kifua mbele na kuhesabiwa miongoni mwa waliobora. Lakini safari hiyo haiwezi kuanza bila uongozi unaoelewa maumivu ya watu wake, na wenye uthubutu, maono, na mpango wa kweli wa kuleta mabadiliko. Ndiyo maana nimesimama mbele yenu leo. Si kwa ahadi, bali kwa dhamira. Si kwa sifa, bali kwa kazi. Na kazi hiyo ni ya pamoja baina yangu na ninyi, watu wa Kisauni.

Bashatir.



NGUZO KUU ZA AHADI YANGU YA UONGOZI

UWEZESHAJI WA KIUCHUMI NA UBORESHAJI WA FURSA ZA AJIRA

Hatuwezi kukaa kimya tukiona vijana wetu wakipotea. Ni lazima tujenge viwanda, tuwape vijana wetu vifaa, tuwawezeshe wanawake, na tufungue milango ya ajira. Kisauni itainuka kwa wananchi wanaofanya kazi.



ELIMU BORA NA UENDELEZAJI WA UJUZI WA VIJANA

Tunaamini kila mtoto wa Kisauni anastahili madarasa ya kisasa, Uongozi wa Kielekezi, na ujuzi wa vitendo. Elimu ndiyo silaha ya kuvunja umaskini na kuwajenga vijana wetu kwa karne hii na mbele.

MIUNDOMBINU IMARA NA UPANGAJI BORA WA MIJI

Hatuwezi kuendelea tukiwa kwenye giza na matope. Lazima tujenge barabara, mifereji, huduma za maji na masoko yanayohudumia watu kila siku. Kisauni inastahili miundombinu inayoheshimu maisha na kusukuma ustawi.

USALAMA NA AMANI KWA JAMII YETU

Hatupaswi kuzoea kuishi kwa hofu. Lazima tuangaze mitaa yetu, tuwarekebishe vijana waliopotea, na tujenge usalama wa jamii pamoja. Usalama unatokana na uaminifu, fursa, na uwajibikaji wa pamoja kila mtaa.


HUDUMA ZA AFYA ZENYE HESHIMA NA UPENDO WA KWELI

Lazima tukomeshe mateso ya kimya kimya. Tunastahili kliniki zilizo na dawa, akina mama kujifungua salama, na vijana kupata msaada wa afya ya akili. Huduma ya afya irejeshe heshima, upendo na matumaini kwa wote.

UONGOZI WENYE UWAZI NA UNAOTANGULIZA WANANCHI

Tumechoka na kimya na mikataba ya gizani. Tunapaswa kudai uwazi, uongozi unaonekana, na maamuzi yanayofanywa pamoja nasi si kwa niaba yetu. Uongozi wa Kisauni hauko juu ya watu – uko mikononi mwao.

MPANGO WANGU



Nimetembea mitaa ya Kisauni, nimekula na familia za wanaichi, nikasikiliza ndoto na kilio cha vijana wanaotafuta mwelekeo. Nimezungumza na wenyewe maono, na viongozi hapa nyumbani na hata ng'ambo níkijifunza kile ambacho kweli hufanya kazi. Mpango huu umechipuka kutoka kwa mazungumzo halisi, tafakari ya kina, na nia ya kuokoa Kisauni dhidi ya kufa taratibu kwa sababu ya kutelekezwa.

Uongozi mbaya haupotezi muda pekee unaiba maisha ya watu. Tukikosea tena safari hii, tunapoteza miaka mingine mitano ya maendeleo.

Mpango huu ndio mstari wetu wa mwisho. Ni wa kuthubutu, ni wa vitendo, na uko tayari kufanyiwa kazi. Kisauni haiwezi kubaki nyuma tena.

Bashatir.



WAZINDUA
KISWAJINI

UWEZESHAJI WA KIUCHUMI NA UBORESHAJI WA FURSA ZA AJIRA

HALI HALISI YA KISAUNI:

Kisauni, kama maeneo mengi ya Pwani, inakumbwa na janga la ukosefu wa ajira kwa vijana. Takwimu za KNBS zinaonyesha kuwa zaidi ya asilimia 65 ya vijana wa kati ya miaka 18–34 katika Kaunti ya Mombasa hawana ajira. Hali ni mbaya zaidi katika mitaa ya mabanda na maeneo ya pwani ambako hakuna mitaji, ujuzi wa kiufundi, wala kazi rasmi. Vijana wengi wameingia kwenye biashara za kila siku kama uuzaaji wa mitaani na boda boda, bila usalama wa ajira au mafanikio ya muda mrefu. Ukosefu huu wa kazi unachochea uhalifu, dawa za kulevyta, na kukata tamaa. Akina mama wanachoka bila msaada, vijana wana vipaji bila zana, na wajasiriamali wadogo wanapigika kwa kukosa mikopo, leseni, na miundombinu mizuri.

MPANGO WANGU:

1. . Kujenga Kituo cha EPZ Kisauni – Kituo cha Ajira na Biashara ya Kisasa

Moja ya fursa kubwa za mageuzi ya kiuchumi kwa Kisauni ni kuanzisha Kituo cha Uzalishaji kwa Biashara za Nje (EPZ) eneo maalum la viwanda litakalowezeshwa kwa msamaha wa ushuru, huduma za haraka kama maji, umeme, na leseni. Tunapendekeza kuanzishwa kwa kituo hiki eneo la Shimo la Tewa au Mwakirunge, ambapo kuna ardhi ya kutosha ambayo haijatumwa ipasavyo. EPZ hii itavutia wawekezaji wa sekta kama ushonaji wa nguo, utengenezaji wa vifaa vya kielektroniki, usindikaji wa samaki na bidhaa za baharini, na huduma za ufungashaji zote zinalingana na mazingira ya pwani na nguvu kazi ya Kisauni. Kwa miundombinu bora, ushirikiano na msaada wa serikali, mradi huu unaweza kuleta maelfu ya ajira rasmi kwa vijana na wajasiriamali wa ndani. Mfano huu umefanikiwa Athi River na Ruaraka, ambako EPZ zimezalisha zaidi ya ajira 60,000, kukuza uchumi wa maeneo hayo, na kuboresha maisha ya watu. Tukileta mafanikio kama hayo Kisauni, hatutaleta ajira tu – tutawasha injini ya uchumi wa ukanda huu.



UWEZESHAJI WA KIUCHUMI NA UBORESHAJI WA FURSA ZA AJIRA

2. Kituo cha Kidijitali cha Vijana wa Kisauni

Katika enzi hii ya kidijitali, nafasi ya mafanikio haipaswi kuzuiliwa na jiografia. Ndiyo maana tutaanzisha Kituo cha Kidijitali cha Kisauni (Kisauni Digital Hub) eneo la Bamburi jukwaa lenye kompyuta za kisasa, intaneti ya kasi, na mafunzo ya stadi zinazohitajika duniani kama uandishi wa mtandaoni, ubunifu wa picha (graphic design), programu (coding), usaidizi wa mtandao (virtual assistance), na masoko ya kidijitali. Mpango huu utashirikiana na taasisi kama Ajira Digital na majukwaa kama Upwork ili kuwaunganisha vijana wetu na kazi halisi za kimataifa. Lengo ni kufundisha vijana wasiopungua 3,000 katika miaka mitatu ijayo tukiwaandaa si kwa soko la Kenya tu, bali kwa uchumi wa kidijitali unaolipa kwa dola, unaotoa uhuru, heshima, na matumaini ya kesho.

3. Uwezeshaji wa Wanawake Kupitia Ujuzi na Masoko

Nguvu ya Kisauni imo kwa wanawake wake akina mama, dada na binti zetu wanaoamka kila siku kupambana bila msaada wa kutosha. Ili kuwawezesha kikamilifu, tutaanzisha Mpango wa Uwezeshaji wa Wanawake utakaolenga ujuzi wa vitendo kama utengenezaji wa sabuni, ushonaji, kilimo-biashara, maarifa ya kidijitali, na mifumo ya kuweka na kukopa kwa pamoja. Wanawake watapewa vifaa vya kuanzisha biashara, mafunzo ya ujasiriamali, msaada wa masoko na vifaa vya teknolojia ili kukuza biashara zao. Zaidi ya hayo, tutaandaa Maonyesho ya Mama Mtaani kila robo mwaka jukwaa la kuuza bidhaa zao, kupata wateja, kushirikiana na taasisi za fedha, na kupata fursa mpya. Huu si msaada tu ni jukwaa la kuinuka.

4. Mafunzo ya Kazi Kila Wodi

Ni lazima tujenge fursa kuanzia chini, mtaa kwa mtaa. Kupitia programu maalum za mafunzo ya kazi, vijana watajifunza fani kama ufundi magari, umeme wa majumbani, mabomba, huduma za hoteli, na hata ujuzi wa baharini unaoendana na nafasi ya Kisauni kama eneo la pwani. Mafunzo haya yataendeshwa kwa ushirikiano na waajiri wa ndani kutoka mahotelini hadi karakana na maeneo ya mashua ili kuwapa vijana nafasi ya uanagenzi na internship zenye malipo. Kipaumbele maalum kitatolewa kwa wale walioacha shule, kwa kuhakikisha hawasahauli tena, bali wanarudishwa kwenye jamii wakiwa na ujuzi, heshima na mwelekeo wa maisha.



UWEZESHAJI WA KIUCHUMI NA UBORESHAJI WA FURSA ZA AJIRA

5. Ushirikiano na Diaspora na Ajira Nje ya Nchi

Vijana wetu wengi wana ndoto ya maisha bora ng'ambo, lakini wengi wao huingizwa katika ulaghai. Ili kuweka njia salama na ya kuaminika, tutaanzisha "Kisauni Diaspora Desk" ofisi maalum ya kuwaunganisha vijana wetu na ajira halali katika nchi kama Qatar, Ujeruman, Kanada, Saudi Arabia na UAE. Kwa kushirikiana na mashirika ya ajira yeny leseni na maadili, tutajenga mfumo wa mwongozo kabla ya kusafiri, msaada wa kisheria, usaidizi wa lugha, na mazungumzo kuhusu ada nafuu za kujiunga. Hizi si ajira tu ni njia za kuinua familia na jamii nzima kwa heshima, usalama na matumaini ya kweli.

CHANZO CHA FEDHA NA NAMNA TUTAKAVYOFADHILI MIRADI YETU:

1. Kuweka angalau asilimia 35 ya NG-CDF kuelekezwa kwenye miradi ya uvezeshaji wa wananchi kama mafunzo ya kazi, biashara ndogondogo, na ajira za vijana.
2. Kutafuta usaidizi wa moja kwa moja kutoka Hazina za Serikali kama; Youth Enterprise Fund, Women Enterprise Fund, Hustler Fund.
3. Kushirikiana na mashirika yasiyo ya kiserikali (NGOs) kama; Aga Khan Foundation, Kenya Red Cross, KEPSA, Ili kutekeleza miradi ya afya, elimu, na ustawi wa jamii.
4. Kuwasilisha mapendekezo thabiti kwa mashirika ya kimataifa kama; USAID, GIZ, UNDP, Ili kupata ufadhili wa maendeleo, ajira, na mafunzo kwa jamii yetu.



BASHATIR AFYA BORA UONGOZI IMARA


HUDUMA ZA AFYA ZENYE HESHIMA NA UPENDO WA KWELI

“Upatikanaji wa huduma za afya si heshima ya kupewa ni haki ya kuzaliwa. Hakuna mwananchi wa Kisauni anayepaswa kuuza shamba au kuteseka kimya kimya ili kuona daktari. Jamii yenyeye afya ni jamii yenyeye nguvu. Kama kiongozi, siwezi kukubali mfumo ambapo kina mama wanajifungua sakafuni, wazee wanakufa wakisubiri foleni, vijana wanapoteza maisha wakisubiri ambulance, na hospitali hazina dawa wala heshima. Hili si kosa tu ni ukatili wa wazi.

Naamini huduma za afya lazima ziwe za karibu, zenyeye heshima, na zenyeye kujali. Kila wodi ipewe huduma bora, usaidizi wa dharura, na vifaa vya kisasa. Naamini kila wodi iwe na ambulance, tujenge hospitali ya Level 4 Mwakirunge, na tuwape mafunzo na marupurupu Wasaidizi wa Afya Jamii. Watu wetu wameteseka vya kutosha. Mabadiliko yanaanza nasi. Maana Kisauni ikiwa na afya Kisauni inaweza kuiureka.”

AFYA NI HAKI, SI BAHATI

Bashatir



AFYA NI HAKI, SI BAHATI

UKWELI KUHUSU HALI YA HUDUMA ZA AFYA KISAUNI:

Katika Kisauni, kupata huduma za afya huonekana kama bahati, si haki. Maeneo kama Mwakirunge, Magogoni, na Junda hayana hospitali ya umma wakazi wanatalazimika kusafiri mbali hata kwenye dharura. Vituo vichache viliwyopo havina wahudumu wa kutosha, vifaa ni haba, na mara kwa mara hakuna dawa. Kina mama wajawazito, wahanga wa ajali, na wagonjwa hulazimika kutumia boda boda badala ya ambulance. Hali hii imesababisha vifo ambavyo vingeziulika.

Wasaidizi wa Afya Jamii, ambao ni uti wa mgongo wa huduma za mtaa, wanahudumu bila mshahara wala vifaa vya kujikinga. Wakati huohuo, visa vya afya ya akili na ukatili wa kijinsia vinaongezeka lakini hakuna maeneo salama, vituo vya matibabu ya mshtuko, wala washauri waliobobe. Ugatuza ulilenga kuleta huduma karibu na wananchi lakini Kisauni imeachwa nyuma kwenye ajira, miundombinu, na bajeti.

Cha kusikitisha zaidi, hatuna mfuko wa afya wa eneo kusaidia wagonjwa maskini wakati wa dharura. Hii si kuhusu ukosefu wa rasilimali tu ni ukosefu wa uongozi. Na hapa ndipo lazima tusimame kwa haraka, kwa mpango, na kwa moyo wa kweli kwa watu wetu

MPANGO WANGU:

1. UJENZI WA HOSPITALI YA LEVEL 4 MWAKIRUNGE

Moja ya mapungufu makubwa kabisa katika huduma za afya Kisauni ni ukosefu wa hospitali kuu katika maeneo yenye idadi kubwa ya watu kama Mwakirunge. Hili haliwezi kuendelea. Tutaandaa msukumo rasmi kwa Wizara ya Afya na Serikali ya Kaunti ya Mombasa, tutatambua ardhi ya umma inayopatikana, na kushirikiana na NGOs pamoja na mashirika ya maendeleo ili kujenga na kuikamilisha Hospitali ya Kisasa ya Level 4 Mwakirunge. Kituo hiki kitakuwa na huduma za dharura, wodi ya uzazi, matibabu ya nje, vipimo vya afya na huduma za duka la dawa. Kwa kutumia NG-CDF na ushirikiano wa sekta binafsi, hii si ndoto huu ni mradi wa dharura unaowezekana. Mara baada ya kukamilika, wananchi hawatalazimika tena kukimbilia Coast General kwa kila tatizo la kiafya.



2. AMBULANSI KILA WODI – UHAI NI KIPAUMBELE

Maisha mengi yamepotea Kisauni kwa sababu ya kuchelewa kwa ambulansi au kutokufika kabisa. Tutaipa kipaumbele ununuzi na usambazaji wa angalau ambulansi moja kwa kila wodi, kupertia mgao wa NG-CDF na ushirikiano na Kenya Red Cross, SHA, au hospitali za mitaa. Kila ambulansi itakuwa na vifaa kamili na wahudumu waliopata mafunzo, na zitadhibitiwa kutoka kituo kimoja cha dharura ili kuongeza kasi ya mwitikio. Hakuna mama anayepaswa kujifungua kando ya barabara tena, na hakuna mtoto anayepaswa kupoteza maisha njiani akitafuta huduma. Hii ndiyo heshima. Huu ndio uongozi wa kweli.

3. MFUKO WA AFYA WA KISAUNI – HAKI KWA WALIO NA MAHITAJI

Magonjwa ya dharura huwapiga zaidi wale wasio na uwezo. Ili kusaidia familia zinazokumbwa na gherama za matibabu ya haraka au ya muda mrefu, tutaunda Mfuko wa Afya wa Kisauni. Mfuko huu utapata msaada kutoka kwa NG-CDF, hospitali washirika, na michango ya wahisani. Lengo ni kugharamia usajili wa SHA, matibabu ya saratani, upasuaji, na dawa kwa wale wasioweza kumudu. Kila wodi itakuwa na kamati ya uchunguzi wa wazi na ya haki kuhakikisha wanaofaa ndio wanapata msaada. Kwa mfuko huu, mzazi hatahitaji tena kuchangisha kwenye matanga kwa sababu hakuwa na uwezo wa kutibu mtoto au mpendwa wake. Huu ni mpango wa utu, si siasa. Hii ni heshima kwa kila maisha ya wanakisauni.

4. TUNAKOMBOA ROHO, SI MIFUMO TU – MAPAMBANO DHIDI YA MAGONJWA YA AKILI, DAWA ZA KULEVYA NA UKATILI WA KIJINSIA

Kisauni inakumbwa na janga la kimya la afya ya akili, uraibu wa dawa za kulevya, na ukatili wa kijinsia (GBV). Lakini hakuna maeneo salama na ya wazi kwa waathiriwa kupata msaada. Tutaanzisha Vituo vya Msaada wa Afya ya Akili na Meza za GBV katika kila kituo cha polisi, ofisi za machifu, na hospitali kuu za eneo bunge letu. Hapa, manusura watapata ushauri wa kitaalamu, rufaa za matibabu, msaada wa kisheria, na hata makazi ya muda kwa ajili ya ulinzi hasa kwa wanawake, wasichana, na vijana.

Tutashirikiana na washauri waliobobe, viongozi wa dini, na mashirika kama LVCT Health na Haki Africa kuhakikisha kuwa heshima ya kila mmoja inalindwa, maisha yanahifadhiwa, na jamii inapata uponyaji. Huu si msaada tu huu ni ukombozi wa utu.

5. Kusaidia na Kuwawezesha Wajitolea wa Afya ya Jamii (CHVs)

Wasaidizi wa Afya Jamii (CHVs) ni mashujaa wasioimbwa wa huduma za afya mitaani lakini wanafanya kazi bila malipo, bila mafunzo ya kutosha, na bila vifaa muhimu vya matibabu. Hii lazima ibadilike. Tutatenga rasilimali za kuandaa mafunzo ya kina, kuwatambua rasmi, na kuwapatia vifaa katika kila wodi. CHVs watapokea posho ya kila mwezi, sare rasmi, vifaa vya huduma ya kwanza, na mafunzo ya mara kwa mara kupertia ushirikiano na Idara ya Afya ya Kaunti pamoja na programu za kitaifa kama Linda Mama na Afya House.

Kwa kuwawezesha CHVs, tutaongeza kwa kiwango kikubwa huduma ya afya kwa akina mama, kuzuia magonjwa, na elimu ya afya moja kwa moja kutoka ngazi ya kaya.

Hili si msaada tu kwao ni uwekezaji kwa afya ya jamii nzima ya Kisauni.

NAMNA TUTAKAVYOFADHILI MABORESHO YA AFYA KISAUNI:

1. Tutatenga asilimia 25 ya bajeti ya NG-CDF kila mwaka kwa miradi ya afya, ikijumuisha ujenzi na uwekaji wa vifaa katika vituo vya afya, ununuzi wa ambulansi, na kusaidia familia zisizojiweza kukabiliana na dharura za kiafya.
2. Tutashinikiza bungeni na katika ngazi ya kaunti ili Kisauni ipate mgao wa haki wa rasilimali za afya, kutoka kwa serikali kuu na zile zilizogatuliwa, kulingana na mahitaji halisi ya watu wetu.
3. Tutashirikiana na mashirika yasiyo ya kiserikali na ya kimataifa, kama Kenya Red Cross, LVCT Health, AMREF, USAID na UNDP ambaao tayari wanafanya kazi mashinani katika kusaidia huduma za afya nchini.
4. Tutahamasisha mashirika ya biashara na Wakenya waishio nje ya nchi (diaspora) kusaidia kupertia programu za CSR na mchangano wa hiari, kwa kugharamia huduma kama ambulansi, huduma za uzazi, na mikakati ya uhamasishaji wa afya mitaani.

AMANI, USALAMA NA FURSA MSINGI WA KISAUNI MPYA



“

Hatuwezi kujenga masoko, shule au ndoto zetu ikiwa vijana wetu wamenaswa katika vurugu, familia zinaishi kwa hofu, na mitaa yetu hunyamaza jua linapotua. Usalama si anasa ni haki. Na kwa miaka mingi, haki hiyo imedorora kutokana na kutelekezwa, ukosefu wa usawa na mfumo usiojali.

Katika maeneo kama Mjambere, Magogoni, Bamburi na Mtopanga, familia nyingi zimepoteza watoto wao kwa sababu ya makundi ya kihalifu, mihadarati, wizi au hata ukatili wa polisi. Hali hii ni ya dharura. Kwa sababu hakuna uwekezaji, hakuna shule, hakuna hospitali wala biashara inayostawi katikati ya woga.

Usalama ndio msingi wa kila kitu. Na vijana wa Kisauni hawapaswi kuonekana kama tishio, bali kama nguzo ya kesho yenye matumaini ikiwa tu tutawapa nafasi ya pili, msaada, na imani.

Amani si kukosekana kwa mvutano, bali ni kuwepo kwa fursa. Na fursa hiyo ndiyo tunaleta kwa watu wa Kisauni.

”

Bashatir.

AMANI NYUMBANI, USALAMA MTAANI

BASHATIR

Usalama wa Watu, Ustawi wa Kisauni

TATIZO LA USALAMA:

Kaunti ya Mombasa ni mionganoni mwa maeneo yenye visa vingi vya ukatili wa magenge ya vijana, huku eneo la Kisauni likiongoza kwa idadi ya matukio. Kulingana na ripoti za uhalifu za KNBS, mamia ya vijana hukamatwa Kisauni kila mwaka lakini hali haibadilishi. Kukamata bila kusaidia kuwarekebisha kunazidi kutengeneza wahalifu sugu. Vijana hujunga na magenge wakiwa na umri mdogo hata wa miaka 13, wakichochewa na ukosefu wa ajira, shinikizo la marafiki, uraibu wa mihadarati, kukosa mwelekeo, na hali ngumu ya maisha. Uaminifu kwa polisi umedorora, hivyo wananchi huogopa kuripoti uhalifu au kusaidiana kuzuia kisasi. Maeneo mengi ya mitaa ya Kisauni, hasa yale yasiyo na mipango rasmi, yamekuwa kama maeneo yaliyosahaulika. Hakuna taa za barabarani, hakuna doria za jamii, wala mifumo thabiti ya ulinzi wa majirani. Giza linapoingia, hofu hutawala. Vijana hujikusanya bila mwelekeo, na uhalifu huota mizizi. Bila mwanga, hakuna matumaini. Bila ulinzi, hakuna uhuru. Hii si changamoto ya usalama tu ni kilio cha jamii isiyolindwa. Na kilio hiki lazima kisikike, kishughulikiwe, na kisitishwe.

MPANGO WANGU:

Hatuwezi kumaliza tatizo hili kwa nguvu peke yake. Lazima tulielewe, tulitibu kutoka mizizini, na tujenge upya mkataba wa kijamii kati ya jamii, vijana, na vyombo vya usalama.

1. Kutoka Genge Hadi Mafanikio – Mpango wa Marekebisho ya Vijana

Ili kushughulikia tatizo la usalama kwa undani, lazima tuanze kwa kuponya maisha yaliyovunjika katikati ya janga hili. Mpango wetu wa kipekee, "Kutoka Genge hadi Mafanikio," umetungwa mahsusii kuwafikia vijana waliokwisha husika na uhalifu au walio hatarini kujiunga na magenge. Badala ya adhabu, tunawapa sababu ya kuishi kuitia ushauri nasaha, usaidizi wa kiroho, na mafunzo ya maisha. Vijana hawa watafunzwa stadi kama useremala, ushonaji, utengenezaji wa matofali, uashi, na ufundi magari. Ajira yao ya kwanza itatoka katika miradi ya jamii: kurekebisha mifereji, kupaka rangi maeneo ya umma, na kusafisha mitaa iliyopuuzwa. Ili kurejesha uaminifu, tutaandaa mikutano ya msamaha ya hadhara, ambapo jamii na vijana watapona pamoja. Hili si wazo la karatasi tumeuona ukifanya kazi. Mathare na Kisumu walipotekeleza mpango kama huu, uhalifu mionganoni mwa vijana ulipungua kwa zaidi ya asilimia 45. Kwa msaada sahihi, vijana wetu wanaweza kubadilisha vurugu kuwa thamani, na hofu kuwa tumaini la kesho.

2. Mwangaza Barabarani, Usalama kwa Wote

Mtaa wenye mwangaza ni mtaa salama. Uhalifu hujificha gizani, na ndiyo sababu tutekeza uwekezaji mkubwa wa taa za barabarani zinazoendeshwa kwa solar katika maeneo hatarishi ya Kisauni kama Barsheba, Magogoni, Mwandoni na mengineyo. Taa hizi hazitaongeza tu usalama, bali pia zitaongeza muda wa biashara usiku, kurahisisha huduma za dharura, na kurejesha imani ya wakazi mitaani mwao.

Mpango huu utaunganishwa na vituo vya ulinzi wa jamii (community watch) na majaribio ya mitambo ya CCTV katika maeneo ya hatari ili kuimarisha ufuutiliaji wa matukio. Lengo letu ni kusakinisha taa 400 ndani ya miaka miwili, kwa ushirikiano na mamlaka ya kaunti, fedha za NG-CDF, na washirika wa kimataifa. Kwa sababu usalama siyo heshima ya wachache ni haki ya kila mmoja. Na sisi tutaiangaza njia ya mabadiliko kwa maana halisi.

Usalama wa Watu, Ustawi wa Kisauni

3. Nyumba Kumi 2.0 – Mtandao Mpya wa Usalama wa Jamii

Mpango wa Nyumba Kumi uliwahi kuwa wazo thabiti sasa ni wakati wake kufufuliwa kwa sura mpya. Tutauzindua tena kama “Nyumba Kumi 2.0” mfumo wa kisasa wa usalama wa majirani unaojengwa juu ya nguvu halisi ya jamii. Kila wadi itaunda Kikosi cha Usalama cha Jamii, kitakachopatiwa mafunzo maalum na kuratibiwa kushirikiana kwa karibu na polisi na makamishna wa mitaa. Vikosi hivi vitapewa vitendea kazi muhimu kama muda airtime, sare rasmi, redio za mawasiliano, na msaada wa vifaa, ili kuhakikisha mawasiliano na hatua za haraka wakati wowote. Kila robo mwaka, tutajumuika katika Mikutano ya Usalama ya Wadi, ambapo vijana, wazee, viongozi wa dini, na vyombo vya usalama watakutana, kujadiliana, na kupanga kwa pamoja njia za kuleta amani na mshikamano. Usalama huanza kwa uaminifu na uaminifu hujengwa kwa ushirikiano.

4. Tamasha la Amani na Vipaji la Kisauni

Vijana wa Kisauni wamejaa ubunifu na vipaji wanachokosa ni majukwaa ya kuonyesha uwezo wao. Kupitia Tamasha la Amani na Vipaji la Kisauni litakalofanyika mara mbili kwa mwaka, tutabadilisha nguvu zao kuwa nguzo ya amani, mshikamano na maendeleo. Matamasha haya yataonesha muziki, mashairi, ngoma, michezo, na sanaa, kama njia mbadala ya kujieleza, kutambulika, na kuimarishe utu wa kijana wa Kisauni. Tutawaleta pia vijana waliowahi kuhusika na magenge walioacha uhalifu, ili kuongea na kizazi kipyä, wakionesha kuwa mabadiliko yanawezekana. Tamasha halitasimama tu kwa burudani kutakuwa na mabanda ya ajira, ushauri wa afya ya akili, na wakufunzi wa biashara. Vijana watakaoibuka na vipaji au ari kubwa watapewa ufadhili wa masomo, vifaa vya kazi, au mtaji wa kuanzisha miradi yao. Hili si onyesho la burudani tu ni tiba, ni jukwaa la maendeleo, na ni daraja la amani kwa Kisauni.

5. Vitengo vya Usalama kwa Wanawake na Watoto

Usalama wa kweli ni pale kila mwanamke na mtoto anaweza kuishi bila hofu. Ndiyo maana tutaanzisha Vitengo Maalum vya Usalama kwa Wanawake na Watoto katika kila kituo cha polisi na ofisi ya chifu. Vitengo hivi vitaendeshwa na maafisa waliopata mafunzo maalum kuhusu ukatili wa kijinsia (GBV) ili kuhakikisha waathiriwa wanasilizwa, wanaaminiwa, na wanalindwa ipasavyo. Zaidi ya hapo, tutaunda maeneo salama kwa wasichana (Safe Girl Zones) katika shule, misikiti, na makanisa, ambapo wasichana wanaweza kupata msaada, ushauri wa kisaikolojia, au usaidizi wa kisheria kwa faragha na heshima. Kuwalinda wanawake si hisani – ni wajibu wa kimaadili na msingi wa heshima na amani katika jamii.

6. Vilabu vya Amani: Kutoka Shulenii Hadi Mtaani

Amani lazima ifundishwe mapema kama vile kusoma na kuandika. Kupitia mpango wa “Vilabu vya Amani: Kutoka Shulenii Hadi Mtaani,” tutapanda mbegu za uongozi, uzalendo, na utatuvi wa migogoro ndani ya watoto wetu na vijana wa Kisauni. Vilabu hivi vitakuwa hai katika shule za msingi na sekondari, vikifundisha wanafunzi thamani ya: Kuepuka vurugu, Umoja wa kitaifa, Haki za binadamu, Na mazungumzo kama njia ya kuelewana. Vijana pia watashiriki katika mentorship ya rika kwa rika, na mashindano ya amani baina ya shule ili kukuza ushawishi mzuri kwa wenzao. Kwa kufundisha amani wakiwa bado wachanga, tunazuia machafuko ya baadaye. Vijana wa Kisauni hawatarithi tu usalama watakuwa waundaji wa amani hiyo.

JINSI TUTAFADHILI USALAMA NA AMANI:


- Tutatenga 10–15% ya NG-CDF kwa miradi ya usalama, taa za barabarani, na kusaidia vijana walioteleza kurudi kwenye njia bora.
- Tutashirikiana na Wizara ya Usalama, mashirika ya kidini, na NGOs za amani kama Haki Africa, UNDP, na Saferworld.
- Tutatumia CSR za kampuni binafsi Mombasa kufadhili vifaa vya usalama, mafundisho, na mikakati ya vijana mitaani.

KWANINI INAWEZEKANA:

Starehe Constituency walipoweka taa mitaani, uhalifu wa usiku ulipungua kwa 60%. Kibra, kupitia mradi wa “Ghetto Classics,” mamia ya vijana waliokuwa hawana mwelekeo sasa ni wanamuziki, walimu na mifano bora. Rwanda, jamii nzima zinalinda usalama wao kupitia mikutano ya kijamii bila kutumia vurugu. Kama wengine wameweza Kisauni pia inaweza kuinuka. Amani inaweza kurudi, lakini lazima tuongoze kwa miyo safi, hekima na vitendo halisi.



Miundombinu Bora na Mpangilio wa Miji



“Eneo bunge lisilo na miundombinu bora ni kama nyumba iliyojengwa juu ya mchanga linaweza kusimama kidogo, lakini haliwezi kukua, kuvutia uwekezaji, wala kulinda watu wake. Kisauni inastahili zaidi ya barabara zilizovunjika na maendeleo ya kiholela. Ni wakati wa kufikiria upya masoko, mitaro, barabara, na majengo yetu kwa mpango wa muda mrefu unaoheshimu utu, usalama, ajira, na mpangilio wa mji.”

Bashatir.



Miundombinu Bora na Mpangilio wa Miji

KILE KINACHOTUKWAMISHA:

Kwa miaka mingi, Kisauni imekuwa ikiteseka chini ya maendeleo duni na ya kiholela ya miundombinu. Masoko yamejaa msongamano, hayana usafi wala usalama, lakini maelfu ya wananchi hutegemea sehemu hizo kwa riziki ya kila siku. Katika wadi nyingi, hakuna hata soko moja lililopangwa rasmi, jambo linalowalazimu kina mama na wachuuzi kuza barabarani wakiishi kwa hofu ya kuondolewa au kuhatarisha maisha. Tayari tumeona vifo vikitokea kutokana na mashimo wazi, mitaro isiyofunikwa, na majengo kuporomoka wakati wa mvua yote yakionyesha ukosefu wa mipango bora na usimamizi. Umiliki wa ardhi pia ni janga kimya wakaazi wengi hawana hatimiliki au wanaishi kwa hofu ya kufurushwa. Barabara nyingi Kisauni ni za msimu zinapitika kiangazi, lakini huwa mateso mvua ikinyesha. Hakuna mpangilio mkuu wa mji, ujenzi mpya unafanyika kiholela bila mitaro, taa za barabarani, wala njia za waenda kwa miguu. Hali hii inakandamiza biashara, kuhatarisha maisha, na kuzidisha umaskini mijini.

MPANGO WANGU:

1. Kujenga Soko Kuu la Kisauni na Masoko Madogo ya Wadi

Tatajengwa Soko Kuu la Kisasa la Kisauni lenye ghorofa katika eneo la kimkakati, likiwa na vyumba vya kuhifadhi bidhaa kwa baridi, vyoo safi, eneo la kuchakata taka, CCTV, na vibanda vya kisasa. Soko hili litakuwa moyo wa uchumi wa Kisauni, likitoa zaidi ya ajira 2,000 za moja kwa moja na kurasimisha biashara za mtaani. Kila wadi Bamburi, Mtopanga, Junda, Shanzu, Mwakirunge, na Magogoni itajengewa soko lake dogo la kisasa, ili mama mboga, wachuuzi na mafundi wawe na sehemu safi, salama, na ya kudumu ya kuendesha biashara. Hili litamaliza manyanyaso ya barabarani na kuleta heshima katika riziki ya wananchi wetu.

2. Mpango wa Mifereji Salama na Njia za Kutembea Kisauni

Tutafanya ukarabati kamili wa mifumo ya mifereji katika maeneo yanayokumbwa na mafuriko kama Barsheba, Magogoni na Mwandoni. Kupitia ushirikiano kati ya NG-CDF na wahandisi wa kaunti, tutaweka mifereji ya kisasa ya zenge iliyofunikwa, kuinua barabara zilizozama, na kujenga njia salama za waenda kwa miguu. Kila ujenzi utafanyika kwa kuzingatia viwango vya kitaifa vya usalama hatutakubali tena majengo kuporomoka au watoto kudondoka kwenye mashimo wazi. Kila maisha ni muhimu, na lazima tuyatendee hivyo.

Miundombinu Bora na Mpangilio wa Miji

3. Mamlaka ya Mipangomiji kwa Kisauni

Tutaunda Bodi ya Mipangilio ya Kisauni chombo cha kudumu cha kisheria kinachojumuisha wahandisi, wapima ardhi, wasanifu majengo, viongozi wa wanawake, na wawakilishi wa vijana ili kuchunguza na kuelekeza kila mradi wa maendeleo ya umma. Hatutaruhusu tena ujenzi wa kiholela usiozingatia mpangilio wa miji. Masoko mapya, barabara, shule na majengo ya umma yote yatafuata viwango madhubuti vyta upangaji wa maeneo, nafasi, mifereji, na mwangaza wa mitaani. Tutajenga kwa ajili ya miaka hamsini ijayo si miaka mitano tu. Huu ni uongozi wa kizazi, si wa msimu.

4. Umiliki Salama wa Ardhi kwa Kila Mtu

Tutashirikiana moja kwa moja na Wizara ya Ardhi na Serikali ya Kaunti ili kuharakisha utoaji wa hati miliki katika maeneo ya Junda, Mwakirunge, Mtopanga, na Magogoni ambako maelfu ya wakazi wanaishi bila umiliki wa kisheria. Kupitia kliniki za ardhi za kijamii, tutafundisha wakazi kuhusu mirathi, sheria za ardhi, na jinsi ya kulinda ardhi ya jamii dhidi ya matapeli. Tutahimiza usajili wa ardhi kwa njia ya kidijitali kwa bei nafuu ili kuondoa rushwa na migogoro ya baadaye. Hakuna familia ya Kisauni inayopaswa kuishi kwenye ardhi wanayoogopa kuiita yao. Tutarejesha usalama wa ardhi mikononi mwa wananchi.

5. Mwangaza wa Mtaa kwa Solar Kisauni

Tutaweka angalau taa 1,000 zinazoendeshwa na nguvu za juu katika wadi zote sita za Kisauni, tukilenga masoko, vituo vya magari ya abiria, njia nyembamba, shule, na vichochoro ambavyo mara nyingi huwa ni maeneo ya uhalifu. Taa hizi zitasaidia: Kupunguza visa vya ujambazi na uhalifu wa usiku, Kurefusha muda wa biashara, hasa kwa wamachinga na mama mboga, Kuboresha usalama wa wanawake na watoto wakati wa usiku. Zikiwa zinaendeshwa na juu, zitahudumiwa na vijana wa maeneo husika, na zitafadhiliwa kupitia mfuko wa NG-CDF, bajeti ya kaunti, na wahisani wa kimataifa. Mradi huu utaangaza Kisauni kwa mwanga halisi na kwa ufanisi wa kiuchumi. Kisauni yenye mwangaza ni Kisauni salama na yenye matumaini.

6. Mpango wa Uboreshaji wa Barabara na Usafiri Kisauni

Tutatambua, kuchora ramani, na kuboresha barabara zote muhimu zinazounganisha makazi ya watu na shule, hospitali, masoko, na vituo vya polisi katika maeneo ya Bamburi, Mtopanga, Magogoni, Junda, Mjambere, na Shanzu. Barabara kama Mwakirunge-Bofu, kiunganishi cha Mtopanga-Magogoni, pamoja na njia za ndani za Mjambere na Junda, zitapigwa daraja, kufukiwa changarawe, na kisha kufunikwa kwa lami hatua kwa hatua kulingana na upatikanaji wa fedha na ushirikiano na wadau mbalimbali. Tutajenga pia madaraja ya waenda kwa miguu, mifereji ya maji ya mvua, na vituo vya mabasi mahali panapohitajika, ili kuhakikisha usalama na urahisi wa usafiri kwa wakazi wote. Barabara bora zitachochea uchumi wa mitaa, kurahisisha upatikanaji wa huduma muhimu, na kurejesha heshima katika harakati za kila siku za wananchi. Hatutaruhusu Kisauni iendelee kutengwa kwa sababu ya miundombinu duni sasa ni wakati wa kutenda.

JINSI TUTAKAVYOFADHILI MIRADI YA MIUNDOMBINU:

- Mgao wa NG-CDF: Tutatenga angalau 30% ya bajeti ya NG-CDF kila mwaka kwa ajili ya miradi ya miundombinu kama vile upanuzi wa shule, ujenzi wa barabara, mifereji ya maji, na taa za barabarani.
- Ushirikiano na Serikali ya Kaunti: Tutashirikiana na Idara ya Miundombinu na Mipangilio ya Miji ya Kaunti ya Mombasa kufadhili kwa pamoja miradi mikubwa ya masoko na barabara.
- Ruzuku na Fedha za Kitaifa: Tutaomba ufadhili kutoka kwa mipango ya kitaifa kama vile Kenya Urban Support Program (KUSP) na Equalization Fund kwa maeneo yaliyosahafulika kama Mwakirunge.
- Msaada kutoka kwa Wafadhili na Asasi za Maendeleo: Tutawasilisha mapendekezo kamili kwa washirika wa maendeleo kama Benki ya Dunia, UN-Habitat, na USAID kusaidia miradi ya usafi wa masoko, mifereji, na upangaji wa miji.

Kwa Nini Ni Muhimu

Kisauni haiwezi kustawi bila miundombinu iliyopangwa, salama, na inayofanya kazi ipasavyo. Bila hayo, mama zetu huuza kwenye matope, watoto wetu wanahatarisha maisha wakivuka njia zilizojaa mafuriko, na wafanyabiashara wetu hupoteza fedha kila siku. Lazima tujenge Kisauni inayowafaa wote sehemu ya mpangilio, heshima, na fursa. Hii si anasa. Ni haki ambayo wakati wake umefika.



BASHATIR

MASOMO BORA,
MUSTAKABALI IMARA

ELIMU NA UENDELEZAJI WA UJUZI

"Shule zetu, kwa masikitiko, zimegeuka kuwa maeneo ya kusurvive badala ya kufaulu zikitengeneza wanafunzi wanaoweza kukariri lakini si kushindana. Kama alivyosema Nelson Mandela, "Elimu ni silaha yenye nguvu zaidi unayoweza kuitumia kubadilisha dunia." Mimi ni zao la elimu na maendeleo ya ujuzi endelevu, na naamini muda umefika wa kubuni mfumo unaofanya kazi mfumo unaochanganya masomo imara na ujuzi wa vitendo kama mafunzo ya kidijitali, kazi za mikono, na ujasiriamali, ili elimu iweze kuboresha maisha moja kwa moja. Kila mzazi Kisauni huota kuona mtoto wake akiwapita kimaisha lakini wengi huachwa wakiangalia watoto wao wakidorora shulenii au kuhitimu kisha kubaki bila ajira. Hatutakiwi kuwapa ahadi tu tunawadaiwa mfumo unaotoa maarifa ya kweli yanayotumika, na unaofungua milango halisi ya maisha bora."

Bashatir



ELIMU NA UENDELEZAJI WA UJUZI

TATIZO:

Kisauni ni nyumbani kwa maelfu ya watoto werevu, wenyе ndoto, vipaji, na ari ya kufaulu. Lakini wengi wao hukumbana na vizingiti nya kusikitisha vinavyowazuia kupata elimu bora. Shule zetu za umma zimelemewa darasa moja linaweza kuwa na wanafunzi zaidi ya 70, huku zingine zikikosa mahitaji ya msingi kama vyoo vinavyofanya kazi, maji safi, au madawati. Mbaya zaidi, mtaala mpya wa CBC, licha ya nia njema, umeongeza mzigo kwa shule ambazo tayari zinahangaika na kwa wazazi wasio na msaada, hali inayowafanya watoto wetu kuteseka zaidi. Matokeo ya KCPE, KPSEA, na KCSE yanaonyesha kuwa watoto wetu hawafanyi vizuri lakini hilo si kosa lao, ni udhaifu wa mfumo. Ripoti kutoka TSC na KNBS zinaonyesha kuwa maeneo kama Magogoni, Mtopanga, na baadhi ya sehemu za Mjambere yana viwango nya juu nya wanafunzi wanaoacha shule, kwa sababu ya umaskini, mimba za utotonu, ukosefu wa karo, na mazingira yasiyo salama ya kujifunzia. Kinachoumiza zaidi ni pengo linalozidi kukua kati ya elimu na ajira. Vijana wengi wanahitimu shule au chuo lakini hawana ujuzi wa vitendo hawajawahi fundishwa ujasiriamali, kutumia kompyuta, wala kutengeneza kitu kwa mikono yao. Wanatoka na cheti, lakini hujiunga tu kwenye foleni ya kutafuta kazi. Maelfu yao wamekwama katika mdura wa kutokuwa na ajira, biashara ndogo zisizo na uthabiti, kukata tamaa, na hatari ya kuingizwa kwenye uhalifu, magenge, au hata misimamo mikali.

MPANGO WANGU:

1. Ahadi yangu ya Msaada wa Masomo na Kurudi Shuleni

Umaskini haupaswi kuwa hukumu ya ndoto za maisha. Ndiyo maana kuitia Bashatir Foundation yangu tayari nimeanza kutoa bursari kwa wanafunzi wanaohitaji msaada katika jamii zetu. Hili si tu tendo la huruma; ni ishara ya aina ya maisha ninayoamini maisha ambapo hakuna mtoto anayefungiwa nje ya shule kwa sababu ya ukosefu wa karo. Ifikapo 2027, Mungu akipenda, na nikiaminiwa kusimamia NG-CDF ya Kisauni haki ya kikatiba kwa kila raia nitaikuza mpango huu ili kufikia kila shule na kila mwanafunzi anayestahili. Kuitia Mpango wa "Bashatir Bursary Scheme" tutaweka mfumo wa wazi na wa kuwajibika kwa kutumia maombi ya mtandaoni, ufuutiliaji kwa SMS, na kamati za mtaa katika kila wadi kwa ajili ya uteuzi. Tutatoa kipaumbele kwa mayatima, wasichana walipata mimba wakiwa bado shuleni, wanafunzi wenyе ulemavu, na wale wanaoishi kwenye mitaa ya mabanda.

Zaidi ya hayo, tutashirikiana na taasisi za kidini na mashirika ya kijamii kuendesha mipango ya kurejesha wanafunzi shuleni, hasa kwa ajili ya kina mama vijana tukithibitisha kuwa nafasi ya pili inaweza kufufua ndoto zilizopotea. Hakuna akili angavu Kisauni inayopaswa kufisia kwa sababu ya umaskini si wakati niko kazini.

ELIMU NA UENDELEZAJI WA UJUZI

2. Kuboresha na Kupanua Shule Zetu za Umma

Hatuwezi kutarajia ubora wa elimu wakati shule zetu zimejaa wanafunzi kupita kiasi, hazina vifaa vya msingi, na mazingira yanayokatisha tamaa kwa wanafunzi na walimu. Tutatumia fedha za NG-CDF kupanua miundombinu kujenga madarasa mapya, kuweka vyoo vya kisasa, kutoa madawati, na kufunga uzio kwenye maeneo yasiyo salama. Kipaumbele kitatolewa kwa shule zilizosahaulika katika maeneo ya Mjambere, Magogoni, na Junda ambako hali ni ya dharura. Pia tutaa jiri walinzi waliopata mafunzo na wafanyakazi wa usafi ili kurejesha heshima na nidhamu katika mazingira ya kujifunzia. Mazingira bora ya shule yanapoboreshwa, ari ya kujifunza huongezeka na matokeo bora hufuata.

3. Vituo vya Mafunzo ya Ufundsi (TVETs) na Ujuzi kwa Maisha (“Skills-for-Life”) Kila Wadi

Degree pekee hazihakikishi ajira tena ujuzi ndio suluhisho la sasa. Ndiyo maana tutajenga au kuboresha Vituo vya “Skills-for-Life” kote Kisauni, ambavyo vitatoa mafunzo rasmi katika fani kama vile ufundsi bomba, nishati ya jua, ushonaji, kulehemu, huduma za baharini, na mengineyo. Vituo hivi, kwa kushirikiana na vyuo vya kitaifa vya TVET na waajiri wa eneo hili, vitahakikisha kila kijana anapata mafunzo na pia nafasi ya kufanya mafunzo kwa vitendo au kuajiriwa moja kwa moja. Tatalenga hasa makundi yaliyo hatarini wakiwemo vijana kutoka mitaa ya mabanda na wale walioacha shule kwa nia ya kuwarudisha kwenye mkondo wa maisha yenye tija. Hili si suala la ajira pekee; ni kuhusu kurejesha heshima na mwelekeo kwa maisha ya vijana wetu

4. Maabara za Kidijitali na Coding kwa Kizazi Kijacho

Mustakabali ni wa kidijitali, na hatutakubali Kisauni iachwe nyuma. Tutaanzisha Maabara za Ubunifu wa Kidijitali katika shule za msingi na upili, zilizo na kompyuta, intaneti thabiti, na programu za kujifunzia, kwa ushirikiano na Ajira Digital, Google for Education, na vituo vya teknolojia vya hapa nyumbani. Kupitia programu kama Coding for Kids, kozi za ajira za mtandaoni, na vilabu vya roboti, tutawaandaa vijana wetu kwa ajira za kesho si tu hapa Kenya, bali pia kimataifa. Tunaamini mtoto wa Mwakirunge anastahili fursa sawa ya kidijitali kama mtoto wa Westlands, Nairobi na tutahakikisha hilo linatimia.

5. Uwezesajji wa Familia, Watu Wazima na Mtoto wa Kike

Tutaanzisha Vituo vya Elimu ya Watu Wazima na Stadi za Maisha katika kila wadi, tukilenga waendeshaji bodaboda, wafanyakazi wa nyumbani, wamama wa sokoni, na akina mama wasio na waume ambao hawakumaliza shule. Hapa, watafundishwa kusoma na kuandika, usimamizi wa fedha, ujuzi wa malezi, na uanzishaji wa biashara ndogo ndogo. Wakati huohuo, tutazindua mpango wa Girl Dignity Initiative kugawa taulo za kike bure, kuanzisha programu za malezi na ushauri, sare za shule, na njia za kurudi shuleni. Kwa sababu msichana anapobaki shuleni, kizazi kizima huinuka pamoja naye. Kuwawezesha watu wazima na wasichana si msaada wa huruma ni ujenzi wa taifa wa kimkakati.

JINSI TUTAFADHILI:

- Kutenga asilimia 25 ya fedha za NG-CDF kwa elimu na miundombinu ya shule.
- Kushirikiana na Wizara ya Elimu, KICD, na TSC kusaidia utoaji wa walimu na kidijitali.
- Kushirikiana na NGOs, mashirika ya kidini, na mashirika ya kimataifa kama UNESCO, GIZ, USAID, na Wings to Fly ya Equity.
- Kuwezesha wazaliwa wa Kisauni na wahisani kupitia mfuko wa “Back to Class.”

Uongozi Wazi na Unaoweka Mwananchi Mbele

Neno Langu la Mwisho kwa Watu wa Kisauni

Sikuzaliwa katika familia ya watu mashuhuri. Nilikuzwa kwenye moyo wa Kisauni mahali ambapo kila mapambazuko yalikuwa vita vya maisha, lakini kila machweo yalileta tumaini jipya. Nimesimama kwenye foleni za kliniki zisizo na dawa. Nimewaona watoto wakitembea peku kwenda shule zisizo na madawati. Nimesikiliza kilio cha akina mama waliotelekezwa na kukosa fursa. Haya siyo takwimu kwangu ni maisha yangu, ni hadithi yetu.

Ninaamini katika uongozi unaosikiliza kabla ya kuongea. Uongozi unaotembea na wananchi, si juu yao. Uongozi unaojitokeza kila siku, si wakati wa kampeni tu. Uongozi unaoumia na watu wake, unasherehekea ushindi wao, na kubeba mizigo yao kila siku. Huu ndio uongozi ninaouamini. Uongozi wa uwazi, wa uwajibikaji, unaotokana na sauti ya wananchi. Uongozi unaoheshimu mwananchi kiasi cha kueleza kila senti ilivyoenda, kuwaalika kwenye maamuzi, na kuweka heshima mbele ya tamaa ya madaraka.

Hii manifesto si orodha ya vitu vya kununua ni tamko la dhamira. Ni mkataba kati yangu na kila mpiga kura, kila kijana, kila mzee, kila mama mboga, kila mwanafunzi, na kila mtafutaji wa Kisauni. Nimeeleza kwa uwazi jinsi tutakavyoboresha miundombinu, kupanua huduma za afya, kuleta elimu na ujuzi kwa wote, kujenga ajira na biashara, kurejesha usalama na amani, na kusimamia uongozi unaomweka mwananchi mbele si kwa nadharia, bali kwa mipango ya kweli inayoteklezeka, na inayoweza kufuatiliwa kwa uwazi.

Siahidi miujiza. Ninajitoa kwa moyo wangu wote kwa uwazi, kwa uaminifu, bila tamaa wala mizunguko. Sikuja kutawala. Nimekuja kuhudumu. Na iwapo kwa neema ya Mungu mkanipa nafasi hii, sitasahau ni nani aliyenituma kule.

Kisauni inastahili zaidi. Siyo tu ahadi bora, bali uongozi bora, mipango bora, na hatima bora. Niko tayari. Tayari kufanya kazi. Tayari kuwajibika. Na tayari kuongoza si kwa kelele, bali kwa moyo safi na maono yaliyo wazi.



Tujenge Kisauni Inayofanya Kazi Kwa Wote!

•••

Kisauni haiwezi kuinuka kwa ahadi tu itainuka kwa umoja. Umoja wa nia, umoja wa wananchi, na umoja wa uongozi unaoweka maslahi ya wengi mbele ya ya binafsi. Lazima tushikane mikono vijana na wazee, wafanyakishara wadogo na wataalamu, wanawake na wanaume tujenge siasa mpya: siasa ya matumaini na mwelekeo wa pamoja.

Turekebishe barabara zetu ili kina mama wasiuze tena kwenye matope. Tuponye hospitali zetu ili watu wasife wakisubiri msaada. Tujenge shule zinazochochea ndoto si hofu. Tuunde ajira zitakazoweka vijana wetu mbali na giza la uhalifu na uraibu. Tuongoze kwa uadilifu maana heshima ya wananchi huanza kwa uongozi safi.

Lengo hapa si tu kushinda uchaguzi ni kuwasha moto mpya wa matumaini Kisauni. Moto wa nidhamu, ustawi, na ushirikiano. Hii ndiyo ndoto ya Bashatir 001, mwaka 2027 ndoto iliyozaliwa kwenye udongo wa utumishi, kunyweshwa kwa imani yenu, na kukuzwa kwa nguvu ya mshikamano wetu.



+254 796 944 005



bashatir@001.com



bashatir.vercel.app

“Huu ni Mwanzo Na Mwisho Watauona”
— Hon. Mbarak Said Bashatir

• • •

HON. MBARAK SAID BASHATIR

2027

+254 796 944 005 

bashatir@001.com 

bashatir.vercel.app 

“Huu ni Mwanzo Na Mwisho Watauona”

— Hon. Mbarak Said Bashatir

